

Hvala Allahu, dž.š., na svim blagodatima, salavat i selam Njegovom poslaniku Muhamedu, s.a.v.s.

Cijenjeni džemaate!

U današnjoj hutbi govorimo o umri, o kojoj se veoma malo zna. Također, literatura o umri veoma je oskudna, pa ćemo se u današnjoj hutbi podsjetiti i naučiti o ovom ibadetu.

U Kur'anu, u 97. ajetu sure Ali Imran, stoji:

"Hodočastiti Kabu dužan je, Allaha radi, svaki onaj koji je u mogućnosti, a onaj koji neće da vjeruje – pa, zaista, Allah nije ovisan ni o kome."

Umra je poseban ibadet koji se sve više organizuje i kolektivno obavlja. Jezički znači zijaret ili posjeta. U šerijatskom značenju umra je zijaret tj. posjeta Kabi na poseban način, uz oblačenje ihrama, obavljanja tawafa, sa'ja, te brijanja ili kraćenja kose.

Put na hadž i umru je jedinstveno putovanje u svijetu, kojem čovjek već poslije prvog odlaska stalno žudi i želi da se ponovo nađe na prostoru svetih mjesta Mekke i Medine.

Hanefijski mezheb, kome i mi u našoj Zajednici pripadamo smatra umru pritvrđenim sunnetom i obavezom jednom u životu i pohvalno je često obavljati i veliki sevab, tog su mišljenja i malikije, dok drugi kažu da je ona farz'ajn jednom u životu.

Poslanik, s.a.v.s. je rekao: "Hadž je obavezan, a umra je dobrovoljna." Također, Muhamed, a.s., kaže: "Od umre do umre Allah, dž.š., briše sve eventualne grijeha, a za primljen hadž kod Allaha, dž.š., nema druge nagrade osim dženneta."

Poslanik, s.a.v.s, je umru obavio četiri puta u svom životu.

Umra se može obavljati tokom čitave godine, izuzetak su samo dan Arefata i dani Kurban bajrama, obavljati u tim danima je izuzetno pokuđeno, prema mišljenju Ebu Hanife.

Zašto je jedinstveno putovanje? Mnogo je toga što bi smo mogli spomenuti da opravdamo ovu tvrdnju, a spomenut ćemo samo neke momente i mogućnosti.

Obaviti namaz u džematu u našim prilikama je 27 puta bolje nego obavljati sam. A obaviti jedan namaz u haremu Kabe vrednije je 100.000 puta više nego na drugom mjestu, a u Poslanikovoju, s.a.v.s. džamiji u Medini 1000 puta vrednije nego na drugom mjestu na zemlji.

Prostor harema Kabe je najdraže mjesto Allahu, dž.š., na zemlji. Onaj ko zijareti ovo mjesto biva Allahov, dž.š., gost.

Zar možemo ostati ravnodušni, ukoliko smo u prilici da poselamimo Poslanika, s.a.v.s., za svog života a to ne uradimo.

Hodati zemljom kojom je hodio naš uzor i učitelj Muhamed, s.a.v.s.

Klanjati u mesdžidu Kuba, džamiji koju je Poslanik, s.a.v.s., napravio za tri dana pred ulazak u Medinu, prilikom činjenja hidžre. Posjetiti mesdžidu Kibletejn, brdo Uhud, mezarja gdje su ukopani veliki broj ashaba Božijeg Poslanika, s.a.v.s., pečinu Hira gdje je počela objava Kur'ana itd.

Završit ćemo riječima Muhameda, a.s.: "Ko posjeti moj kabur zaslužio je moj šefa'at (zauzimanje na Sudnjem danu)" i "ko me posjeti poslije moje smrti kao da me je posjetio dok sam bio živ."

Braćo i sestre,

Nesmijemo tražiti razloge da se ne upućujemo na umru, nju treba želiti, njoj stremiti i ona će se realizirati. Umra je tu da nas očisti i da nas približi svome Gospodaru.

Islamska zajednica Bošnjaka u Švedskoj u saradnji sa organizacijom El-Kiram, ove godine u periodu novogodišnjih praznika, krajem decembra i početkom januara organizuje zajednički odlazak na Umru.

Ovo je idealna prilika da izvršimo pritrđeni sunnet našeg Poslanika, s.a.v.s., i zaslužimo njegovo zauzimanje na Sudnjem danu.

Pozivamo sve zainteresovane kandidate da se na vrijeme prijave i prikupe potrebnu dokumentaciju. Formular prijave za umru, uplatu i kopiju pasoša dostaviti do 15. novembra, a kompletnu dokumentaciju za dobijanje vize potrebno je poslati do 28. novembra na navedenu adresu u pozivu.

Činimo dovu Uzvišenom Allahu, dž.š., da ovo skromno kazivanje bude od koristi svima nama, da se zainteresujemo za ovaj ibadet, te da nam primi sve naše ibadete i uvede nas u Dženneti Firdevs! Amin